

կայանայ պատմական վայրերի, որք լերանս կողերուն վերայ զեփեղուած են, Կապուտայ բերդն և բերդաւոր անտառն ի հիւսիս արեւմուտս ի խոնարհ, Կարոյի դիւղ և ձորն ի հարաւ արեւմուտս, Վարդէհէր կամ Վարդիկ հօր վանք և ուխտատեղին սարկաւազներու ի հիւսիս արեւելս: Մեզմէ 1 ժամ արեւելս տարածուած է Արզի և Փոխ-եռւրդ վրանաբնակներու վարատեղիքն: Մերձեցանք այս գագաթան հիւսիսային ծայրն, լաւ ևս Վիշապաձորի և Կապուտայ ջրի հովիտները բաժանող բարձրութեան վերայ կանգնեցանք, ուղղուած ենք ի հիւսիս, մեր արեւելեան հիւսիսն ի վայր կը պարզուի ամբողջ Վիշապաձորի հովիտը:

Վիշապաձորս քանի խորախոր ձորերէ կազմուած է, մեծ ջրի յարեւելս շատ բարձր դիրքի մի վերայ կանգնած է Վարդէհօր վանքն՝ շրջապատուած դժուարամատչելի ահագին ժայռերով, որք շարունակութիւն են ի հիւսիս արեւմուտս խոնարհած Չամչա մեծ լիւին: Վարդէհօր վանքի մէկ ժամ հարաւն Սարկաւազներու ուխտատեղին: Վանքի արեւելս բարձր սարի մի վերայ Ս. Մամասայ ուխտատեղին, իսկ արեւմտեան հիւսիսն, որպէս ասացինք, կը տեսնուի Կապուտայ ընդարձակ հովիտը և ջրի ձախ ափի վերայ չափազանց բարձրացած քարալիւններն, ուր և կայ հինաւուրց յաղթանդամ ծառներով զարդարուած անտառ մի լերան գագաթն, որ և բազմաթիւ սրտաձմիկ անցքերու հանդիսատես եղած է. այս լերան վրայէն կերևան Սողանլուի հռչակաւոր անտառներն, որք տարածուած են յայնկոյս Երասխայ:

Արդէն մեր ուղին շարունակելով տակաւ առ տակաւ կը խոնարհինք, ճանապարհը վտանգաւոր է ձիա-